

9. november 2017

UKA2917/33

**Inatsisartunut qinersisarnermi qinersiviit amerlanerulersinnejarnissaat anguniarlugu
Inatsisartunut qinersisarnermi inatsisip allanngortinnissaa pillugu apeqquteqaat
aallaavigalugu Inatsisartut oqallinnissaannik siunnersuut.**

(Inatsisartuni Siumup gruppe)

Nunagisami pisussaaffinnut assigiinngitsunut qinersisarnerit inuit tamat oqartissaqataanerannik pingaartitsilluni ingerlatsinissamik tunngaveqarpoq (Demokratiimik tunngaveqarluni ingerlatsineq).

Siumumiit sulissutigaarput demokratiip tunngaviginissaa, soorlu Siumup siunertaani ima allassimasoqartoq; Issuaaneq aallartippoq, ”*Siumup anguniarpaa*”:

- *Kalaallit Nunaata aqunneqarnerani ammasumik inuillu oqartussaaqataanerat pingaartillugu ingerlatsineq nukittorsassallugu.*

Demokrati tassaavoq naqisimaneqarani qinersisarneq, amerlanerussuteqartut naalakkersuinerat, ikinnerussuteqartut pisinnaatitaaffeqarnerat naqisimaneqaranilu isummanik saqqummiussuisinnaaneq. Siumut isumaqarpoq socialisme demokratimik tunngavilik tassaasoq demokratip politikkut, inuit atugarisaasigut aningaasaqarnikkullu piviusunngortinneqarfia.

Siumumiit isigalugu demokrati inerisarluarneqarsimasoq tassaavortaaq inuttut atugarisatigut toq-qissisimaneq naligiinnerlu, ilinniartitaariaaseq pitsaasoq, kiisalu piginnittussaatitaaneq, nammineq suliffigisami nunaqarfigisamilu innuttaasuni sunniuteqarneq aalajangeeqataasinnaanerlu”. Issuaaneq naavoq.

Aamma maannakkut naalakkersuisooqatigiinnermi isumaqatigiissummi ima allassimasoqarpoq; Isuaaneq aallartippoq, “Inuit oqartussaaqataanerat ataaqillugu nunattalu naapertuunnerusumik sinniiseqartarnissaa qulakkeerumallugu, naalakkersuisooqatigiit isumaqatigiissutigaat Inatsisartunut qinerseriaaseq nalilersoqqissaarneqassasoq”. Issuaaneq naavoq.

Siumumiit pissusissatut eqqortutut isigaarput isumaqatigiissuteqarsimagaanni aamma isumaqatigiissutaasut ataaqillugit naammassiniarlugit suliarineqartassasut timalersorlugillu, taamaammat Siumumiit oqallissisaq saqqummiunneqartoq pissusissamisoorluinnarpoq naamassillugulu oqallisigineqartariaqarluni.

Qangali ileqquuvoq Nunatsinni qinersiviit kommunikaartumik aggornilersorneqartarnerat. Taamanikkullu 1990-sikkut naajartorneranni kommuninik iluarsaaqqinnej kingulleq aallartisarneqaleruttorpat aammalu nunatsinni naalakkersuinikkut ingerlatseriaaseq nutaamik aaqqissunneqaleruttorpat Inatsisartunut qinersisarnermi qinersivimmik ataasiinnanngortitsineq 1998-simni pisimavoq. Tamattalu nalunngisatsitut maannakkut ukiuni makkunani kommuninik iluarsaaqqinnej inaarsarneqarpoq innuttaasut amerlanerit aamma piumasaat naapertorlugu.

Tamatumalu aamma kingunerisaanik Kommuninut qinersisarneq nutaannongornikuuvoq, Siumumiit isumarput naapertorlugu torrallatamik, tassa kommuneqarfitoqaasimasut qinikkatigut

sinniseqartarnissaat qulakkeerlugu. Siumumiillu isumaqarpugut aamma Inatsisartunut qinersisarnermi ullumikkut kommuneqarfiusimmasut tamarmik inatsisartuni mandatinik aaliangersimasunik amerlassusilikkanik sinniseqartarnissaat qulakkeerneqartariaqartoq.

Siumumiit isumaqarpugut Nunatta isorartoqisup innuttai tamaasa eqqarsaatigalugit piffit tamarmik Inatsisartuni sinniseqaqqilernissaat pingaaruteqarluinnartoq, nunatsinni innuttaasut tamarmik aamma sumiiffit pingaartillugit peqataatinneqarnissaat pingaaruteqarluinnarmat.

Siumumiit aamma pingaartipparput nunat allamiut Nunatsinni qinersisinnatitaasarnerisa erseqqissumik isummersorfiginissaat, tamanna siunissami avaqqunneqarsinnaanngimmat.

Nunatsinni ukiuni makkunani Naalagaaffinngornissatsinnut piareersaleruttorpugut, naalagaaffinngornissatsinnut tunngaviusumik inatsiseqarternissarput suliaralugu aallartinneqareerpoq, taamaammat aamma siunissaq eqqarsaatigalugu qinersisarnikkut inatsiseqarnermi naalagaaffittut eqqarsarluta inatsisiliortariaqalersussaavugut, tamanna eqqaamassallugu pingaarutilerujussuovoq.

Nunarput naalagaaffinngorpat ullumikkut naalagaaffeqativut Danmark Savalimmiillu naalagaaffeqatigunnaartussaavagut, taamaalillutlu taakkunani nunani innuttaasut aamma nunat allamiutut isigalugit inatsiseqarnikkut nunami maani atugaqalesittussaassavagut, soorlu aamma Kalaallit - Kalaallit Nunaanni innuttaasut Danmarkimi savalimmiunilu taamatut inatsisitigut periarfissaqalerumaassasut. Taamattumik siunissami immaqa qanittumi qinersisarnikkut periarfissarititaasut allanngortariaqalernissaat aamma isummerfigisariaqassaaq. Allaat Siumumiit isumaqarpugut suliartorlutik maani najugaqarallartartut ukiut marluk maaneeqqaarlutik qinersisinnalertariaqartut, ullumikkutuunngitsoq ukiup affaa maaniiginnariarluni qinersisin-naalluni.

Aamma naalagaaffinngorutta nunat allamiut ikinnerpaamik ukiut arfineq marluk nunatsinneeqqaarlutik kalaallit nunaanni innuttaaqataasutut akuerineqartalersinnaanerat taamaalillutillu qinersisinnalertarnissaat oqallisigineqartariaqartut ilagilluinnarpaat, ullumikkut assersuutigalugu scandinaviamriut Finland, Island, Norge, Sverige inuit 18-leereersimasut ukiuni 7-ini Danmarkimeeqqaarlutik innuttaaqataalersinnaasartut qinersisinnaleralutillu.

Oqallinnermi tamatta peqataalluarnissarput neriuutigaarput.

Pitsi Høegh, Siumut